

Morning Dogri (NSD) National News Bulletin 17-08-2024

आकाशवाणी

- भारत अज्ज त्रिये वायस ऑफ ग्लोबल साउथ शिखर सम्मेलन दी वर्चुअल ढंगै कन्नै मेजबानी करोग।
- केन्द्री मंत्रिमंडल नै बेंगलुरु, पुणे ते ठाणे लेई त्रै मैट्रो रेल परियोजनाएं गी मंजूरी दित्ती ऐ।
- आईएमए ने कोलकाता च रैसिडेंट डाक्टर दा बलात्कार ते हत्या खलाफ मुख्य भरै च 24 घंटे दी हड़ताल दी घोषणा कीती ऐ।
- ईलाहबाद हाई कोर्ट नै उत्तरप्रदेश सरकार गी राज्य च 69 जहार सहायक अध्यापकें दी नियुक्ति लेई नमें सिरेया सूचि बनाने दे निर्देश दित्ते न।
- भारत ते श्रीलंका बश्कार मुसाफर किश्ती आली सेवा परतियै ब्हाल होई गई ऐ।
- पैरिस पैरा ओलंपिक्स च भारत नै 84 खडारिएं दा दल भेजेआ ऐ जेह्दे चा 47 जनें पैहली बारी पैरा ओलंपिक्स च हिस्सा लै'रदे न ते 50 जनें Tops योजना दा लाह थोआ ऐ।

<><><><><><>

Voice of Global

भारत त्रिये कुल संसारी दक्खन शिखर सम्मेलन वॉयस ऑफ साउथ समिट दी वर्चुअल ढंगै कन्नै मेजबानी करोग। इस शिखर सम्मेलन दा विषय ऐ "इक टिकारु भविक्ख लेई इक बाख्ख्यार कुल संसारी दक्खन"। विदेश मंत्रालय दे प्रवक्ता रंधीर जयसवाल होरें नमीं दिल्ली च पत्रकारें गी जानकारी दिंदे होई आखेआ जे सब्बने कुल संसारी दक्खन मुख्यें गी इस शिखर सम्मेलन च शामिल होने दा साददा दित्ता गेदा ऐ। एह सम्मेलन दुनिया पर असर पाने आले पलेचमी बक्ख-बक्ख चुनौतिएं जित्थें युद्ध, खुराक ते ऊर्जा सुरक्षा दा संकट ते जलवायु तब्दीली समेत मसले बारे सोच बचार करने दा इक मंच होग।

शुरूआती इजलास मुख्य दे प्रमुख ते सरकार दे स्तर पर होग। प्रधानमंत्री मोदी होर एहदी मेजबानी करगन। त्रिये गेड़ च 20 अगस्त गी भारत ते जापान दे विदेश ते रक्षा मंत्रिणं दी मीटिंग होग।

<><><><><><>

Metro

केन्द्री मंत्रिमंडल नै मुख्य च त्रै नमीं मैट्रो रेल परियोजनाएं ते दो नमें हवाई अड्डे दे निर्माण दी मंजूरी देई दितती ऐ। इनें परियोजनाएं पर 15 जहार 6 सौ करोड़ रपे दी लागत कन्ने बंगलुरु मैट्रो दा त्रिया गेड़ 12 जहार दो सौ करोड़ रपे दा ठाणे रिंग मैट्रो ते तकरीबन त्रै जहार करोड़ रपे दी लागत कन्ने पुणे मैट्रो रेल विस्तार परियोजना शामिल ऐ। मंत्रिमंडल दी मीटिंग मगरा सूचना ते प्रसारण मंत्री अश्विनी वैष्णव होरें नमीं दिल्ली च दस्सेआ जे बंगलुरु मैट्रो परियोजना कन्ने शैहर च ट्रांसपोर्ट सरिस्ते गी सेई चाल्ली दा बनाने च मदाद होग।

<><><><><><>

IMA Strike

भारतीय मैडिकल एसोसिएशन आईएमए नै पच्छिम बंगाल दे सरकारी मैडिकल कालेज आर.जी. कर मैडिकल कालेज ते अस्पताल कोलकाता च इक महिला डाक्टर कन्ने बलात्कार ते उंदी हत्या दे खलाफ अज्ज 24 घेंटे दी राश्ट्रव्यापी हड़ताल करने दा आह्वान कीता ऐ। एह संगठन पीड़ित गी न्याह दोआने ते सेहत सरबन्धी वर्करें दी हिफाजत लेई इक केन्द्र कनून दी मंग करा करदा ऐ। इस आह्वान दे मगरा मुख्य भरै दे होर सेहत सरबन्धी संगठन अपना विरोध करा करदे न।

<><><><><><>

HC-UP Teachers

ईलाहबाद हाई कोर्ट नै उत्तर प्रदेश सरकार गी निर्देश दित्ता ऐ जे ओ राज्य च 69 जहार सहायक अध्यापकें दी नियुक्ति गी लेइयै नमें सिरेआ सूचि तैआर करै। अदालत नै जून 2020 ते जनवरी 2022 गी जारी कीते गेदी तालमा सूचि गी रद्द करी दित्ता ऐ। इस सूचि च 6 जहार 800 मेदवारें दा नां शामिल हा।

न्यायमूर्ति ए.आर.मसूरी ते न्यायमूर्ति ब्रिजराज सिंह होरें इस बारे आदेश जारी कीता। महेन्द्रपाल ते होरने आस्सेआ खास अपील दायर कीती गेदी ही। इस अपील च पिछले ब'रे 13 मार्च गी इक्कले जज आस्सेआ दित्ते गेदे आदेश गी चुनौती दित्ती गेदी ही।

<><><><><><><><>

JK Election

जम्मू कश्मीर च त्रऊंससैंबली दे चुनां कराए जांगन, अगले म्हीने दी 18 तरीक गी पैहले गेड़ दा चुनां होग। हरियाणा च इक्कै गेड़ च पैहली अक्टूबर गी चुनां होंगन। जम्मू कश्मीर दी 90एं मेंबरें दी असैंबली ते हरियाणा विधानसभा लेई पाए गेदे वोटें दी गिनतरी 4 अक्टूबर गी होग। मुख्य चुनां कमीशनर राजीव कुमार होरें कल नमीं दिल्ली च इक प्रेस कांफ्रेंस दरान जम्मू कश्मीर ते हरियाणा च असैंबली चुनाएं दी तरीकें दा ऐलान कीता। चुनाएं दी घोषणा होने कन्नै आदर्श आचार संहिता बी अमल च आई गई ऐ। श्री कुमार होरें आखेआ जे जम्मू कश्मीर च अगले म्हीने दी 18 तरीक गी पैहले, 25 तरीक गी दुए ते पैहली अक्टूबर गी त्रिये गेड़ दा मतदान होग। उनें जानकारी दित्ती जे जम्मू कश्मीर च 87 लक्ख कोला मते मतदाता 90एं मेंबरें आली असैंबली लेई लीडरें दे भागें दा फैसला करगंन। 11 ज्हार 800 मतदान केन्द्र बनाए जांगन। उनें आखेआ जे कमीशन नै हाल च जम्मू कश्मीर ते हरियाणा च चुनां दी तैआरिएं दा जायजा लैने लेई उत्थूं दा दौरा कीता हा। उनें इस गल्ला दा जिक्र कीता जे प्रशासन आस्सेआ मेदवारें गी सुरक्षा उपलब्ध कराई जाग। उनें जानकारी दित्ती जे हरियाणा च दो करोड़ कोला मते मतदाताएं लेई 20 ज्हार कोला मते मतदान केन्द्र बनाए जांगन।

<><><><><><><><>

NC Election

साबका मुख्यमंत्री ते नैशनल कांफ्रेंस दे प्रमुख डॉ. फारूक अब्दुल्ला होरें मेद प्रगट कती ऐ जे भारतीय चुनां आयोग जम्मू कश्मीर च सब्बने सियासी पार्टिएं गी इक्कै जनेआ मौका उपलब्ध कराग। कल श्रीनगर च मीडिया कन्नै गल्ल करदे होई उनें आखेआ जे ओह नेई चांहदे जे कुसै इक पार्टी गी विशेष तरजीह थ्हांदी रवै ते बाकी दल अनदिक्खी दा शकार होइयै अपना चुनां प्रचार बी ढंगै सिर नेई करी सकन।

डॉ. अब्दुल्ला होरें अगगे आखेआ जे प्रशासन ते सुरक्षा विभागें च बड्डे पैमाने पर तबादले ते बदलाव होंदे दिक्खियै इआं बझोंदा ऐ जे प्रशासन गी चुनाएं दी घोषणा बारे पैहले गै पता हा। उनें आखेआ जे चुनां आयोग गै एहदा संज्ञान लेंदे होई प्रशासन गी इनें तबादलें पिच्छे दी मंशा बारे जरूर पुच्छना लोडचदा।

<><><><><><>

Congress Chief

जम्मू कश्मीर लेई विधानसभा चुनाएं दी घोषणा होंदे गै कांग्रेस नै वकार रसूल वाणी हुंदी थाहर पार्टी दे वरिष्ठ लीडर तारिक हमीद कर्रा होरें गी जम्मू कश्मीर प्रदेश कांग्रेस कमेटी दी नमां अध्यक्ष बनाया ऐ। जारी इक ब्यानै च पार्टी महा सचिव के.सी.वेणुगोपाल होरें दस्सेआ जे कांग्रेस दे वरिष्ठ लीडर तारा चंद ते रमण भल्ला होरें गी जम्मू कश्मीर प्रदेश कांग्रेस कमेटी दा कार्जकारी अध्यक्ष बनाया गेआ ऐ।

<><><><><><>

Srilanka Ferry Service

भारत ते श्रीलंका बश्कार कल मुसाफिर किश्ती सेवा गी परतियै ब्हाल करी दित्ता गेआ ऐ। एह सेवा अक्तूबर 2023 गी शुरू कीती गई ही। एह सेवा भारत दे नागापट्टनम ते श्रीलंका दे उत्तरी सूबे जाफना बश्कार चलदी ही। एह सेवा इक प्राइवेट संचालक इंडिया-श्रीलंका फेरी सर्विसिस आस्सेआ चलाई जंदी ऐ। इन्नै तकरीबन 50एं यात्रिएं कन्नै तकरीबन चऊं घैंटे च अपना पैह्ला सफर तैह कीता। जाफना च भारतीय कौंसल नै यात्रिएं दा सुआगत कीता।

<><><><><><>

Paris Olympics

अजें तोड़ी दा सब्बने शा बड्डा 84 खडारिएं दा दल इस ब'रे होने आले पैरा ओलंपिकस खेड्डें च हिस्सा लैग। पैरा ओलंपिकस खेड्डां इस म्हीने दे 28 तरीक थमां 8 सितम्बर 2024 तोड़ी चलगन। 47 खडारी इनें खेड्डें च पैहली बारी हिस्सा लै'रदे न।

पैरिस पैरा ओलंपिक्स आस्तै जा'रदे भारती खडारिणं दे दल गील संबोधत करदे होई केन्द्री खेड्ड मंत्री मनसुख मांडविया होरें आखेआ जे इस दल च 50 खडारी ऐसे न जिनेंगी टारगेट ओलंपिक्स पोडियम स्कीम थमां लाह् थोआ ऐ। इस स्कीम हेठ सरकार नै खडारिणं गी हर इक सहूलियत जियां प्रशिक्षण, कोचिंग दित्तियां न। मांडविया होरें आखेआ जे खेलो इंडिया खेड्डें चा बी केई खडारी उभरियै आए न। पिछली बारी दी टोक्यो च होई दी पैरा ओलंपिक्स खेड्डें च भारती खडारिणं उम्दा प्रदर्शन कीता हा ते 19 तगमे अपने नां कीते हे। इंदे च 54 भारती खडारिणं हिस्सा लैता हा।

<><><><><><>

IMD

मौसम सरबंधी मैह्कमे नै पेशगोई कीती ऐ जे मुल्खै दे पूर्वी ते बश्कारले हिस्सें च अगले 6एं दिनें च भारी बरखा होई सकदी ऐ। मैह्कमे नै आखेआ ऐ जे बंगाल दी खाड़ी दे उत्तर पूर्व ते पच्छम बंगाल दे आले दुआले घट्ट दबाह् दा क्षेत्र बनने कन्नै छत्तीसगढ़, मध्यप्रदेश, मध्य महाराष्ट्र, ओडिशा, पच्छम बंगाल, झारखंड, नागालैंड, मणिपुर, मिजोरम, त्रिपुरा, सिक्किम, अरुणाचल प्रदेश, असम ते मेघालय च इस म्हीने दी 22 तरीक तोड़ी बरखा पेई सकदी ऐ। केरल, तमिलनाडू ते कर्नाटक च अगले दऊं दिनें च टामी-टामी थाहरें भारी कोला मती भारी बरखा पौने दा अनुमान ऐ।

<><><><><><>